

天真閣集

天真閣集卷十三

詩十三

昭文 孫原湘 子瀟

冬日偕子梁赴陽羨將探善卷張公諸勝

歲晏翻爲汗漫遊  
仙人把袂得浮邱  
洞天雲朵先迎客  
水國蘆花不繫鷗  
早辦金箱圖五嶽  
且攜蠟屐上孤舟  
錦峯回首如相笑  
忍舍家山一角秋

晚霽

靜掩孤篷觸浪行  
蕭蕭兼挾荻花鳴  
已拌永夜燒燈聽  
不分斜陽照水明  
雲葉尙疑含雨意  
艣枝多愛作秋聲  
料應兩處紅窗下  
同語船牕倚晚晴

二鼓次梁谿

燭花紅瘦小牕關  
對坐原如閣一閒  
犬吠暗知邨漸近  
艣聲柔

與路俱彎清霜愈逼詩情老流水應輸僕睡閒推出半丸篷底  
月比人先到九龍山

雲邨

流水沿橋折寒隄落漲痕白雲三兩樹黃葉一孤邨帘影聊成  
市蘆聲直到門家家菰米熟飽飯就籬根

書夢

偶談山水已飄然身在幽微小洞天吹下瀑花和月凍拾來香  
草比人妍烟霞自帶秋衾裏仙笛猶聞角枕邊夜半欲呼同伴  
說恐驚歸夢正纏綿

長橋夜泊

水冷月無聲停橈看月明誰家孤笛弄中夜瘦蛟鳴偶憶將軍  
事長憐風土清平生飛動意談虎氣縱橫

陽羨官齋戲語張椒卿

重來小杜感年華  
鱸橘香中一繫查  
相見別無他語雜  
縱談山水又談花

君爲紅燭官書計  
我了青鞵布韞緣  
乞得一編風土記  
滿天寒雨又開船

將之張公洞守風東次

萬頃風濤退  
艣枝蘆花颯颯雨  
絲絲一燈紅  
傍鷗邊宿孤夢清  
先鶴背騎好境  
未來尤耐想  
名山終到不嫌遲  
明朝豫擬推篷看  
隔水螺峯隱約姿

東溪道中紀行

夾溪青翠倒山光  
脩竹枝枝拂面涼  
應有美人來照影  
淡雲微雨似瀟湘

蜀山烟際小於螺細雨吹花水弄梭卻憶坡仙艤舟處畫樓天  
遠夕陽多

青烟縷縷白雲閒窳屋參差畫水環誰似大彬風骨好不將名  
字媚鈴山

舊是庚桑小洞天

見道書  
白龜經

張陵丹竈屬何年神仙顯晦猶無定

占得名山亦偶然

市頭冬筍賤如泥細縷橙香搗作齏風味他年忘不得玉潭莊  
口小橋西

篷牕盼殺晚晴時雨翠偏生灑竹枝水鳥似歌泥滑滑勸商驢  
券去尋詩

泊湖汶鎮

寒雨晚蕭蕭孤峯不可招炊烟難脫樹市火只沿橋度曲長年

暇看書短燭消少卿遊記在昔我寫今宵

都元敬遊張公洞記至湖收鎮微雨

### 坐雨

登臨歸思雨因循坐聽蕭蕭灑白蘋石滑愁支謝公屐風低空  
塾郭生巾雲如作夢難爲主山竟無靈不返賓脩到仙居原未  
易世閒何限半途人

### 題舫

畫溪多畫舫此舫最相宜小女名茶葉長年唱竹枝爐清斑滴  
翠牕煖殼明蠡消得詩人坐燒燈夜夜詩

### 喜晴

曉夢未分明猶疑浙瀝聲正思回櫂急未擬入山行欹枕聽人  
笑推牕見日驚連朝愁苦坐頓覺此身輕

### 入山

白雲封斷列仙家撥杖空尋石徑斜尋到洞門雲不見一株紅  
葉似桃花

張公洞

南唐李氏時碑云以張道陵得名

前洞白雲入後洞白雲出一氣空玲瓏中間百千折我遊自後  
始昏暗如秦室梯滑跣不留石吻手僅扶偏仄步既窮鉤援腕  
欲折強以尻代趾屈使顙顙膝嶙峋擦耳過險怪迎面瞥中閒  
聳脊背左右洞曾穴匍伏赴壑蛇瑟縮緣領蝨轉逕忽開朗前  
後人鬼別若從前洞來至此定迴轍出暗顧轉驚先難乏皆逸  
置足既有恃寓目始可悅鍾乳懸奇形雷同百無一裊裊青蓮  
枝攀之勁于鐵仙草明瑠璫清泉應琴瑟丹竈氣猶蒸石牀圭  
未缺張公爾何往崖像肖纖悉神仙本虛無天巧亦人說空存  
古瑤臺仰視天光徹疑懸一片冰萬古常不裂我上雲倒下雲

氣爲我咽驅雲反出洞既出雲已失還顧洞中雲萬態氤氲結  
不從此中來焉知洞空絕

玉女潭

玉女飛上天一鏡函秋冷惟有山中人時來照清影前人與後  
人照影幾回新不如水底月自瀉空潭春

從孟山往磬山道中作

積雨衆山潤策馬忘寒冬蒼然古木瘦露出千芙蓉白雪導人  
行先過前溪松林密逕屢迷澗斷岡復重歷異不知遠夕陽已  
西峯萬物苦凋謝脩竹何葱蘢衣上落餘翠澗底聞疏鐘牽蘿  
尋小憩寂歷無人蹤

宿聖月寺

夜靜衆慮歇萬籟俱到耳不知松風爭抑爲泉石使心清轉不



寐冷臥白雲裏手弄寒月光牀前滿秋水自空聞妙香卽境悟  
名理遲遲夢欲來鐘聲又催起

戲贈寺僧印川

破帽騎驢客太顛逢迎深愧遠公賢石泉煮月教新浴布被熏  
香勸早眠金粟前身疑佛轉青山到處有僧緣明朝粥鼓匆匆  
去喜捨檀那半幅箋

越羊嶺

絕壁萬仞削破青天青騎驢不可度人反牽驢行從來得力  
處往往卽累生心隨飛鳥去身愧浮雲輕後趾危甫脫前踵峻  
又迎苔滑足屢卻葛弱手暫憑回顧萬丈谿始覺升空冥上坡  
意瑟縮下坂氣縱橫非不陟險隘撒手誇我能所以古君子從  
善稱如登

澄光寺

萬綠到此合秀色不可擬落木雖蕭蕭未改蒼翠理我來忘寒  
冬蟬語疑在耳但覺幽興生一往不能已前望旣足翫返顧猶  
可喜足下流水聲曲折隨步履隱隱見佛閣參差競雲起繞寺  
皆飛泉寬接僧廚裏一飯就香積無心扣宗旨急須尋白龍長  
嘯又行矣

龍池歌

撥開白雲一串月石骨中藏水晶闕大池蕩蕩居龍王次池龍  
婦爲椒房小池龍子一部落水泛金光射日角老僧默祝祝水  
飛一鱗浮動青玻璃摘珠改服蜺蜺服身是龍身目龍目青天  
倒影天亦驚地底隱隱鞭雷聲隆冬萬物不長養莫作出山行  
雨想

碧鮮巖

在善卷寺右舊有碧鮮菴相傳祝英臺故宅今廢

一逕踏殘瓦寒雲落葉邊  
梵宮猶若此華屋更何年  
石色碧於樹草痕輕似烟  
不知何與我摩碯爲淒然

宿善卷寺

唐大中年建宋時殿柱爲雷震文曰詩米漢謝鈞記寺西有九斗壇皆燬

夕陽投古寺清磬出來迎  
落葉新詩路歸雲遠客情  
犬閒猶護竹僧樸但知耕  
一夜空人夢松聲又瀑聲  
客起比僧蚤絕無鐘磬譁  
星壇眠麈鹿雷柱逸龍蛇  
獨樹撐殘月流泉洗曉霞  
閒尋唐宋碣剔損古苔花

善卷洞

在國山東南周幽王時洞忽自開廣容千人中有立石高丈餘號王柱洞之深處有石牀石竈

官中一笑岐山裂  
陽氣震蕩不得洩  
走向大江南玲瓏結仙穴  
霄籟電掣青玉開  
見出縹緲金銀臺  
幽微靈秀不可到  
二千年中我一來  
仙人于此弄狡獪  
奇石都鐫一爐內  
人物鬼怪紛異

形側立倒挂殊零丁如喜如怒各性情有情無情視鈍靈橫看  
一面側一面變化隨乎人所見洞門老樹亦逞奇以石爲土身  
無皮根與石融兩性宜石從根出石筍齊一枝石筍一仙牖仙  
人出門仙鼠守白雲飛來走入壁隱隱篆文作蚪蚪無壁不穿  
透有竅皆嵌空天生玉柱撐瑤宮撐住萬朵青芙蓉不然爭不  
冥冥飛落隨罡風我思攜家住于此醉吸丹霞煮石子與仙同  
生與仙死偶眠白玉牀忽聞流水成宮商起來尋水無一滴銀  
河翻在足底立

善卷水洞

在乾洞下

洞下有洞洞若樓樓上反顧樓下愁不愁上難先愁下欲下不  
下不能罷洞門畫若雙扉開一條白龍飛下來蜿蜒入洞不卽  
入風卷珠簾半空溼人行穿水水穿雲雲石不分水石分洞中

滴水不到眼水走石中人石踐足下如奔萬馬蹄雙股戰栗心  
竟飛愈轉愈曲路愈細聲亦漸如古樂器水激石竅竅自鳴忽  
然波濤隨足生惜無蓮花作我筏但有蓮花壓人髮石形二十  
八宿全到此卽是天河天卻聞上頭人語響天上有天不可上  
急走出洞心目開自笑卻從天上來

遊張公善卷畢歸舟口號

杜光庭天下洞天福地記張公善卷其二

天下洞天七十二尙餘七十未攀尋烟霞總出文章口泉石能  
消仕宦心福地本來隨處有仙人只是入山深姓名那用閒題  
壁多少殘碑絕壑沈

黃貞女

貞女許嫁吳鵬瞻生平不識鵬瞻而但聞人道鵬瞻賢生得偶  
賢是天定偶不論婚只論聘不偶生偶安我命不死死夫盡我

性不奔喪夫則殤有妻得立子無妻竟絕嗣我不知恩知義耳  
謂我心不死請問我阿姊嘉慶二年二月十一日貞女禮成吳  
氏室房中何所有一儿不髹漆匱中何所有繡絲寸寸裂三年  
守百年偶往從地下同白首其時四年九月二十九貞女姓江  
夏黃貞女籍隸太倉絃此詩存綱常彼二臣者冠而裳

無錫慧山下唐氏女矢志不嫁鬻畫以養送父母邑人

士請旌其孝復徵詩美之

鬻畫女事親生以身代弟以身代兄以畫代賈以畫代耕

一朝

畫一花夕畫一鳥父母不得溫飽焉得盡埽東絹十丈長花日

百本鳥百雙

解二

鳥在紙上飛益親身上衣花在畫中粲加親盤

中饌行人見畫不肯買日炙風吹色不改

解三

鬻畫女六十如兒

時父母七十八十臨死不知身無兒爲親造墳兒事畢從此寫

生皆淚血

解四

烏頭綽楔慧山下曰

天子旌貞孝者貞孝伊何

人唐姓素則名姓名已在畫中識又見石上霏五色

解五

文孝女

邑人文某生十二女而無子以次遣嫁至末名金者

獨慨然曰皆去誰事父母盡焚廬具而以女子終其

身

生十二人無一人第十二人畱此身此身豈不樂有夫婦倫有

夫婦倫無天親及此未受人聘緡願親以女當子兮以假作真

不能為親似續分猶能為親操作竭苦辛不見樹上烏無雄雌

一一反哺報其慈

歸烈婦

烈婦孫氏適生員歸

維祿

年五十無嗣力貧操作積

金百餘餅夫死以金飾終悉合於禮夜雉經死

夫生則生死則死二十年來志如此上無衰親下無子身不徇  
夫更何俟七寸棺一尺衾厚君節終具捐妾匳中金焉得匳中  
金朝泮潏絛莫紉鍼生養死送盡婦力餘金猶足婦衣食與爲  
虛生徒自奉願人築我夫婦冢

屈宛仙夫人梅花繡囊歌

吳竹橋丈得煮石山農墨梅長卷丐夫人爲繡此囊  
縱橫變化於畫外別出一奇作歌以紀韻事

夫人前生藐姑射梅不在妝在胸臆以鐵爲筆絲爲色與梅花  
王樹其敵橫斜反正高下側段高二尺勢十尺一朵一變不可  
測數十朵如千萬億畫中崛彊枝有力見此低頭自藏匿人來  
看畫忘畫惜先畫而看後畫畢非繡非畫幾不識無墨痕無鍼



綫迹畫若通靈飛去日留此空囊足畫值

百晦硯歌

邑張翁以千金購端溪下巖正洞石縱六寸橫四寸  
博一寸許精華純萃上品也其後兄弟析產爭欲得  
硯議以硯抵田百乃歸其季百晦之名以此張旣中  
落趙子梁具明珠文錦如其田值聘歸爲平生所蓄  
諸硯之冠屬余作歌

張家百晦不可耕趙家得之如連城千金買田田是石縱橫量  
來不滿尺朝灌薔薇露莫生碧松烟夫吟一章婦一篇夫婦相  
敬如賓然宛若滋蘭樹蕙於其間人生果得百晦田平地可易  
八品官趙君對官卻不識雙眼只識端溪石

琅玕硯歌

子梁得百晦後又得東洞下巖石縱橫與百晦埒博  
過之精瑩細潤溫然如玉背刻竹一枝字以琅玕子  
梁自奉百晦而以此供宛仙夫人復邀余歌

石君虛中本如竹靜而不搖自然綠不在瀟湘雲水間瀟湘雨  
色何斑斑佳人洞房翠裊薄終日隨身倚之樂脩書續班氏藉  
君削成史裁書寄阿環藉君報平安或放管夫人作畫畫上石  
上同一派天生聰明絕俗人何可一日無此君置君於綠天字  
君爲綠仙不是尋常綠可折心秉貞筠勝于鐵

歲莫苦雨

歲晚人多事偏逢雨不休未須滋薺麥空自沁田疇臘雪殊無  
意春陰豫可憂但饒清趣味茗盃碧雲流

上章浥灘

花朝小集

天放新晴助古歡  
簾波猶自滯餘寒  
紅綃繫樹通身豔  
綠酒傾尊到手乾  
佳會豫堅來歲約  
好花偏耐故鄉看  
昨朝祇恐今朝雨  
萬事從來逆料難

燕筍

新泥迸出燕來初  
風味登盤百不如  
玉體瑕疵無半點  
仙心澄滓已全除  
人情一飽徒思肉  
我欲孤行并廢蔬  
晚食未妨供大嚼  
齒牙清脆腹清虛

屠笏巖刺史

紳

招集游文書院玉蘭花下

滿院香飛玉樹柯  
一尊清賞泛紅螺  
量如才太包容得  
情到交深脫畧多  
揭帳生徒觀女樂  
升堂夫子與人歌  
無錢日日花前醉  
自有侯芭載酒過

清明

清明偏是不清明  
繞屋風聲雜雨聲  
花到半開吹已落  
草纔經翦溼還生  
人烟冷斷炊三日  
臺閣昏如夢一城  
寒未肯消春漸  
老天公無力放新晴

江陰蘇梅坡學博

珩

爲外舅席應辰先生姊夫余初婚

時君適來相與詩酒爲樂別二十年矣今年忽惠兩絕句慨然于今昔之事感其意答之

謝公堂上酒尊寒  
絲竹東山墜古歡  
坦腹我慙郝鑒壻  
白頭君老鄭虔官  
鳥投深樹高飛倦  
雲散空霄再聚難  
兩首新詩情百感  
幾回摺疊又開看

仲春日訪徐嬾雲秀才

雲路

新居時余主講玉山書院

去秀才居祇數武

滿屋書聲滿庭苔是詩人住不須猜君如幽谷遷鶯出我似東風社燕來巷口路纔通細草牆頭香可過春醅看花豫訂終年約猶及梅花未半開

一牆花作兩家春無意求鄰卻有鄰蜂蝶往來原不禁童奴呼喚亦相親句商隔院哦詩夜聲誤敲門問字人珍重前緣香火在莫教他日憶今晨

過周處士家看花

濃香清曉透門前引我登堂有蝶先對客顏羸饒古韻種花身健廢春眠人如不俗終難富事果能癡便可傳莫怪近時風雅少如君家具已翛然

呂叔訥學博

星垣

招飲新陽學舍出示文彙中有與先

公飲酒詩及送之成都別駕詩先公自從征巴勒布

後音問遂絕故已酉死狀君未及聞酒次畧述梗概  
乞爲先公表墓卽用卷首鐵冶亭侍郎保韻奉贈侍  
郎亦先公故人飲酒詩卽侍郎座上作也

萬事回頭卽今古萬古才人同一譜史高一尺人幾人其餘紛  
紛盡沙土奇才小用亦偶然此恨難憑女媧補茫茫塵海一廣  
文手擲新詩逗秋雨目如巖電破積疑胸如秦鏡窮妍媸二百  
卅首有韻史五丁不可一字移眼中惟有古人在身後那屑羣  
兒譏拊髀捫蝨貫經濟豈徒彪炳光陸離春風吹人老何速五  
十名場應科目天以儒官位鄭虔人將經席推王肅馬鞍山頭  
一遇君山桃花笑鵲聲哭酒酣脫帽說長安我亦淚珠傾一斛  
先公愛客尤愛才酒龍詩虎殊雄哉與君壇坫日下開名士如  
鯽盈千枚霓裳小部當世推鯨鐘羯鼓喧如雷我時未得控鶴

來仙夢一失終凡胎自從從軍馬虺隤勞臣汗血灑佛灰手磨  
盾鼻丸青煤佐將軍往服厥魁量沙聚米才恢恢捷書鏐吹皆  
新裁忽聞母訃驚飛災報親報國以死該小臣死事不入史  
大節誰能說原委願借東萊論史才痛寫故人忠滿紙君文妙  
得史遷旨擲向寒灰定飛起論官數到廣文終論文數自先生  
始

玉山

孤峯卓立秀如文百折丹梯上白雲絕頂苔花仙不掃滿城梅  
樹鶴爲羣人天畫界惟春水今古閒情總夕曛眼底最堪憑弔  
處黃忠臣墓震川墳

豈有神仙種玉還一拳遺下小螺鬟平生奇癖偏於石天下佳  
名是此山對策未能甘頰首照人先已愧韶顏何從真覓瑤華

島秀到三分便不頑

東巖西岫恣冥搜  
漸覺春烟水樣浮  
一塔夕陽收下界  
萬家暝色入高樓  
濤翻松頂雲俱駭  
風撼蓮花佛亦愁  
我醉暫來天半立  
玉山無力自低頭

歸虞山一月雨中重赴鹿城攜具甫畢嬾雲適來以偕  
遊玉山七古見示走筆次韻

風帆獵獵細雨斜  
推篷一山聳髻丫  
隔雲嫣然若招我  
可惜天半珠簾遮  
草堂門前楊柳碧  
繫我小舟如瓠瓜  
掃除未已客先至  
裏出新句誇八叉  
語奇字險韻帖妥  
柳蘇欲并成一家  
山靈見此定首肯  
豈徒闢黎籠碧紗  
世閒名勝恆河沙  
區區一卷誰賞嗟  
柳州石城本培塿  
徒以子厚諸記嘉  
黃州赤壁亦平削  
乃邀東坡兩賦誇  
此山稱尊無佛處  
便覺惹情如蓮花  
春光雖去



可追及重遊不嫌添足蛇語罷天公亦解意漸收雨腳垂紅霞  
牆頭碧峯透雲出宛若微笑露齒牙喜山如喜酒得賒喜晴如  
喜廢得爬偶然寫目卽寄興聊以慰情非嗜亦譬令門生食單  
議不得食肉且食蝦明朝好蠟謝公屐汲泉去門盧仝茶燒燈  
細聽縣堂鼓隔林已噪初陽雅

芍藥和杜梅溪大令

羣玉

豔情濃過晚春時婪尾杯香煖最宜四月韶華空鳥夢百花零  
落宵蟲絲軍能獨殿才何大貴未封王秩少差好是街西老詞  
客早裁蕉葉門新思

辦香詞

秦州箏柱越州絃齊唱新聲阿子筵獨把幽蘭悄無語心香一  
瓣爲青蓮

狎鷗軒校書

大好軒亭對遠山一灣秋水當柴關平生事事忘機甚偏到備書不肯閒

月

永夜攬清輝那顧寒侵骨縱使再團圓不是今宵月

爲叔訥題陳郎漢碧小影

閔貞畫

墜歡前夢總如塵重語春明舊日春正是江南落花候可堪還對卷中人

白頭博士淚如絲一幅生綃愛閱癡雙頰紅酣雙黛碧不曾相見尙相思

溫硯爐歌

梁谿邵文莊寶故物上有文莊自銘四十八字今在顧觀察光旭家

隆冬萬物春心死端石花枯裂青紫忽如煖玉生曉烟巧奪造

化天無權火爲心兮金作腹虛受仍還石面目橫十一寸縱得六此中溫然一黍谷文莊儒臣悟易理此爐貺以易之旨圓孟坎盈方艮止離蘊文明鼎無耳水火既濟心皆春以陽逼陰媪相噀履霜堅冰且潛伏惟此終日隨其身文琴孔鼎不可得後生覩此亦足珍天寶內庫七寶製徒有其巧無其神顧君得此竦然拜石泐金寒此不壞徵詩萬言逞光怪不能逃出四十八字外

屈宛仙夫人白描芍藥

筆妙遙傳李伯時紅情偏是白描宜玉盤本自空雕飾金帶何曾借采絲一綫餘春痕不著二分明月影相差笑他多少豐臺客爭買燕脂鬥巧思

蕭主簿彈琴歌同叔訥作

秋花不語鸞皇眠纖雲四卷空秋烟靜者心悟聲希前無聲之  
聲至樂宣石案落葉音鏗然清商冷飛秋入絃一彈秋氣回春  
妍再彈山花笑欲仙碧海練靜銀河懸臣心如水指上傳神遊  
太和神乃全彼鴻冥冥在高天

枇杷

輕黃一舸洞庭東穩翦湖梢怕趁風脫手彈丸探自出關心私  
札貯當中扇搖南院憂先解酒載西園摘易空喜是箇人新病  
起額邊顏色與伊同

料無青鳥可銜殘連理情深萬顚攢不信蠟還甜似蜜果然金  
已化爲丹輕呼盧橘猶沿誤冷笑黃媒未脫酸纖手自搓圓當  
藥教人猜是粵東丸

阿誰花裏閉門居節物驚心四月餘欲補右軍求果帖曾抄伊

尹釋山書剝膚先要除銀甲潤肺何勞借玉魚不讀嶺南新語  
熟慢將詞賦笑相如

桃李同盤莫妬他犯寒迎暑氣中和兒非恃色情先勝客縱疑  
麤味卻多晚節曾陪松翠蓋淺痕宜濺杏黃羅風前誤聽街頭  
喚欲索梅卿爲按歌

輓趙季子

小閣清談月滿櫺每掀簾子入來聽卽貪游戲原溫雅偶諧文  
章亦性靈春水生時花灩灩木犀開候霧冥冥而今都作思君  
料一度游蹤一涕零

鏡花水月題詞

花本迷離月本虛印來水鏡更何如空中樓閣非非想天際眞  
人渺渺予蜨夢莊耶莊夢蜨魚知我否我知魚文人游戲神通

大包得華嚴一藏書

烏有先生亡是公傳神都在渺茫中  
技如秋月千人見筆有春花五色工  
悟到真機原潑潑拈來妙手總空空  
豈知寫盡人情處照海靈犀照膽銅

鏡樣空靈水樣神就中花月悟前因  
癡心撈取原無物對面簪來自有人  
卽色是空空是色何真非假假非真  
阮咸輕易論無鬼鬼在當前揖作賓

年來說部競如麻莊語諧詞各一家  
知己二三同笑樂寓言八九總風華  
詩人作頌歌元鳥遷史開端紀白蛇  
自古人心好奇怪紛紛經史尙爭誇

蒔蘭

幕天席地閒不著紅一點身是素心人  
惟蘭與之善

欲時幽蘭姿先應去蕭艾國士本無雙如何伍樊噲

野望

黃葉落已盡秀氣含雲烟寒潭映晴空徹底俱澄鮮扁舟望無極日莫何時還

秋暑殊酷

輭紅何處覓蓬萊招殺清風不肯來樹有蟬聲都渴露庭無人蹟久枯苔歇成樂府屑乾燥逃入甜鄉眼倦開卻憶田家更辛苦望余樓閣似瑤臺

自題畫梅絕句

夢密嫌疏取次添眼前春意十分妍此生願化羅浮蝶一朵花中住一年

拈豪隨意綴珠胎隨手圈成爛漫開開到山坳雲缺處水邊橫

過一枝來

梅花取直不取曲此理世人多未推詩人獨得花情性不畫庭梅畫野梅

老幹縱橫直不彎點苔參用米家山翛然獨立真超絕雪月紛紛盡可刪

寫梅一枝補蘭於右

逸如瀟湘雲清如峨眉雪學其態者死撫其影者拙合之則兩美分之則雙絕如欲軒輊之還請花自說

上海夜泊

停橈喚渡夕陽邊極浦寒生渺渺烟雨過虹拖秋入海潮來船共月浮天帆檣勢比烏鴉集城郭形如島嶼圓聞道浙東方寇警洋山未是撤兵年



秋夕

卷簾人在水晶宮。縹緲樓臺蜃氣同。大地盡爲秋蕩漾。太虛惟有月清空。縱橫難埽千花影。淒怨偏聞一笛風。我欲乘查問消息。恐驚星斗夢寬中。

贈廬江孫山人嘯壑

嘯翁抱琴湖海遊。琴所到處天爲秋。興來爲我一揮手。明月走入絃中流。我心飄然在羅浮。梅花亂落仙人樓。忽然又在湘江頭。水雲自弄蒼梧愁。移情易性皆此聲。此聲以外無性情人間萬籟不到耳。眼中惟有青山橫。嘯翁抱琴不輕撫。海內幾人解秋語。有時寧寄綠陰眠。倒把秋雲向空數。

馬鞍山下遇袁蘭邨參軍通

吳下名花白下船。翠尊紅襖碧山邊。霞橫極浦詩情豔。秋在空

林畫筆妍同以煙雲成錮疾偶然風月亦因緣神仙杖履今何處回首倉山各黯然

謂隨園丈

主講玉山叔訥梅溪嬾雲先後治具未能答也適有饋肴蒸者分送諸君戲書代簡

東西分送貯筠筐聊佐餐英舉一觴我自借花爲薄獻人休疑藥不輕嘗郇公廚味曾先飫陸氏莊租久已荒萬事盡從無意得莫猜渠是束脩羊

以子魚羔羊二品饋叔訥僮奴回攜示和詩二章并索轉和

烹魚

陳饋纖鱗不滿筐翻勞斗酒自謀觴膾成聊比韓侯饒羹定先煩宋嫂嘗懸鮓久知官愛潔占魚共喜歲無荒江鄉風味應同

嗜配得儒官小宰羊

魚羔

肥豕甘鮮實小筐佐君談笑引壺觴  
千皮恰比書生賤一臠宜分御士嘗  
只要封侯博關內何勞持節向蠻荒  
與君濯髮吹簫去莫羨他家食萬羊

院課日諸生林立兩舍語笑喧騰飯訖寂然視之則各散矣戲簡叔訥學博

攢弁如星列絳幃喧騰兩舍語啁啾  
上堂魚鼓千僧集散社雞豚一飽休  
董子膠西經輟講文翁蜀郡教應脩  
惟君慰我蕭齋寂落日花前繫紫驕

題李玉樵都轉

世望梅窩

昔題梅窩卷以意造花花在眼  
今游梅窩中以身入畫畫在胸

遊畢更看畫意中花在畫之外看罷更題詩真花與畫兩不知  
人生浮雲無定所忽而長安忽故土不如梅花只在空山空花  
飛不出窩之中梅花尙怕春風惡不如圖中之花一一吹不落  
與君且倒花下壺爲我喚取花魂蘇花前醉把此卷讀添我看  
花入畫圖

睂泉觀瀑歌爲徐緯堂同年垣作

誰將太湖三萬六千頃挂向屋角東南天天風倒捲不肯上化  
作百道珍珠簾上有初月之纖纖下臨明鏡之清淵翠禽照影  
雙黛白沐浴凡羽都成仙飛泉到此作一束然後奔騰下瀉成  
長川不須白雲變春水自足灌溉東山田我思李青蓮手弄三  
疊匡廬泉醉時響雪聲中眠君今對此心悠然珠璣咳唾隨風  
圓何必身到匡山巔會須攬身入銀浦手撒珍珠作膏雨

寒夜赴郡

殘月四更霜滿天  
好風吹我蘆中船  
青山入冬睡如佛  
綠水渡夢輕于仙  
艣枝呀啞孤鴈語  
帆葉奮迅秋鷹翥  
起看酒醒是何處  
鷄聲膈膊閭門邊

遇蘭邨吳門同訪方臺山陸鐵簫布衣

諸公落落客我狂  
飛花喝月傾瑤觴  
坡仙老去小仙至  
舊雨雜沓新雨忙  
酒龍詩虎氣盡伏  
輕鳳飛鸞歌正長  
豔思豪情一齊發  
天風吹下寒梅香

同張子和比部踏雪斟酌橋買醉

風吹滿店雪花勻  
白玉壚頭喚買春  
綠水自還原面目  
青山全失瘦精神  
詩關天分清逾妙  
語透人情澹更真  
斟酌橋邊共斟酌  
歲寒難得兩閒人

玉臺曲

并序

吳江某翁饒於貲擅園亭聲伎之樂有男子八人最  
憐其少因縱之豪奢裘馬烜赫照耀里閭娶於周生  
女玉臺六齡失恃外王父爲江右偏將軍挈以行少  
子旣喪偶益事狹斜遊翁歿不一載數萬金蕩如以  
屋售桐鄉鄭氏僦小屋以居故娶曲中人爲妾至是  
無聊賴倚以爲生計諸兄聞之擯不齒焉玉臺嚮外  
家十年周父子相繼歿仍歸其父父妾方色衰見玉  
臺喈曰天人也因招素與狎者百計誘之父益困豪  
飲縱博如故玉臺十指供給不能得一朝餐豪家子  
以重利啖其父父因與妾謀鍵戶箠楚之玉臺不得  
已習音律色藝爲一時冠然見客殊落落歌酒外則

以疾辭庚申冬日余過松陵鄭氏賞其園居之勝鄭子爲余言玉臺事余感其志作玉臺曲以示世之好義君子當有能拔蓮花於火宅者

吳江楓落芙蓉開諸公盡醉花前杯燈昏水驛迢迢夜聽我低徊唱玉臺玉臺生小藏金屋城北青溪第三曲沁水池臺豔綺羅東山歌舞凝絲竹西園公子太豪奢一曲纏頭綾一束梟雉常從客舍呼鴛鴦只向皋橋宿深閨小女字平陽顰面桃花玉雪光送鴈雲中能賦別聽琴膝上辨宮商琴聲忽地中絃絕慈竹霜天易枯裂可憐少弟泣呱呱阿耶不念人同穴外家遠挈古南州膽怯風濤彭蠡秋六齡失母如孤燕千里依人逐海鷗回望垂虹秋色遠松林月落鬼啾啾蘆花井少衣相寄麥飯誰陳土一邱閒雲潭影催時序窺鏡盈盈年十五有客傳書說故

鄉平泉已屬他人簿西華葛坡久無親南阮犢禪難庇女虎帳  
雖憐轉徙多蛾眉幸免飄零苦豈知命薄似風花劉妹終離阿  
舅家早識歸來非大夏不如栖泊在天涯杜曲門庭長秋草飛  
蓬正苦秋孃老恰逢嬌女乍還珠喜爲主人歌得寶多買燕脂  
勸曉妝儘調絃索教舒爪那顧瑕從白璧生但求橐取黃金飽  
此時惟抱女貞枝此際寧容墨染絲朝織寸縑裁弟服莫求浙  
玉供耶炊寧從泔泔成龜手未肯章臺學畫眉自小都忘花下  
戲客來難向竹間窺其柰咸陽興如故醉中一擲金無數飲泣  
惟呼慈母靈暴雷屢觸高堂怒可憐灼灼拒霜花橫肆摧殘莫  
遮護九死何難母是從千回畢竟親誰顧牀前幼弟病軀深郊  
外遺棺淺土露生長名閨十九年阿耶自把嬌兒誤龐山湖水  
清復清照儂心迹自分明私將玉鏡臺前恨譜入當筵阿子聲



歌聲未已千行淚露啼非爲東君媚莫題詩上照春屏莫翻酒  
污交紅被願拔蓮花出污泥根在九泉都感佩此曲翻成果斷  
腸有心人必肯珠量飛花終有飄茵日只莫輕逢李十郎

雪夜同仲瞿

消得銀餅瀉酒聲雪中詩思倍聰明梅將入夢先通信蘭本同  
心不要盟歲晚天妝瓊樹豔家貧風掃玉堦清縱談莫及人間  
事芒角愁看漸漸生

吳大頊儒登岱還索詩

昔過泰安郡遙望東南峯至今清夜夢猶繞秦時松君躡仙人  
石應尋黃帝蹤天門如可扣吾欲排雲封

語及神飛動登臨意若何眼中天下小足蹟古人多聖代無  
封禪懷柔遍嶽河聊吟梁父就慷慨爲君歌

戴笠圖

到處蕭然一笠輕相逢何必下車盟東坡著屐猶多事未免拖泥帶水行  
詩人自號石梁子手執道書冰雪顏前身或是天台崔來往桃花瀑布間

過謝氏小樓下

吳研史待詔贅於謝余過之縱談謝氏子恂恂侍側  
家有小樓爲讀書所余嘗與待詔徘徊花下謝子從樓際搖古桂樹聲簌簌落英如霰余爲誦竹垞句以爲笑樂未幾謝子死待詔適病余往視爲余言夜夢謝子邀之去不祥未幾亦死今年秋偶過其處間桂花無恙而兩君已在窈冥之鄉可悲也已

問訊樓中事花香自滿樓二人惟我在老樹爲誰秋今昔蟻同  
夢賢愚貉一邱明知感無謂清淚不禁流

王生行

生不能殺賊親書露布橐亦須上書去作指佞草胡爲有口只  
思飲酒多有手但愁作詩少世上懦夫何足論王生爾是飛將  
軍曾提寶刀侍虎帳花苗亂似春谿雲元戎令下貔貅肅一塵  
盡起陰山伏追北歸來笑插刀渴飲苗奴血一斛將星夜落壯  
士閒束縛奇氣歸詩仙閭門十月春釀好手撲狐裘雪花繞離  
騷一葉酒一杯意氣公然醉鄉老方今潢池弄兵殊未安百姓  
畏賊兼畏官兵驕卒情不肯戰無人敢以此事陳 金鑾王生  
王生何不一舉去黃鵠展布胸中六韜熟罷戰高歌競病詩封  
侯纔享昇平福卽今畱賓夜閉陳遵門焚香埽榻交情敦牀頭

寶刀夜半忽嘯出似聞啾啾百萬生苗蒐

舟行

一縷殘霞閣樹低如花碎雨晚淒淒天公何事心難定纔要東風又轉西

片帆隱隱隔天河蹴浪飛花一霎過我有孤篷如我嬾看人家使順風多

贈穆堂侍御

聖主能容直臺臣孰致身安危須有係衰病惜斯人卜築青山老憂時白髮新且應扶杖起猶及太平春

上海歸舟

遠浦蕭寒弄夕陰水雲如絮襲衣襟鳥投高樹棲何穩人對斜陽感易深殘歲尙爲飄泊計逆風偏阻急歸心思量且掩篷窗

臥又聽邨邨搗莫礎

研史既卒之二年余適小極夜夢至官廨朱扉扃焉有肩輿來者呼余聲甚習一奴持手版書本邑教判吳某審視君也自言由郡城來投謁匆匆入角門去數武後旋轉云有小影乞詩已屬家人矣如是復去余亦尾入見堂上燈燭如星文士數百輩方搦管構思類今縣試東楹對坐兩人一爲少時同硯張某一爲族兄某皆死十餘年者余旁睨其所作文義記族兄二語云善以口成惡由心結方驚詫間一吏踞而請曰此間非公所宜入不急去吏且重得罪余未及應吏遽持巨槌擊鼓聲霽然遂醒汗流離下疾頓失時嘉慶庚申九月某日也翌日君家果以冊屬題因作

長歌弔君而并書其夢

是何城郭烟冥冥仙邪鬼邪乘雲耕頭銜手版作官樣頗似屬吏趨公廳猶能認得故人面呼我爲作長歌行打窗落葉鏗然驚滿牀涼月覓蘇醒思君夢君亦偶爾未必果是君之靈明朝長鬚扣門至攜示畫冊君如生對之令我雙淚落陡憶六七年間情王子之秋蔣君史竹座與君把臂交心傾後來詩文互酬唱如花跗萼鸞同鳴公車並策蹇驢小下第同放歸舟輕歸來六月荷花明相約賦詩倒綠醺謝庭五郎玉貌清趙家季子尤亭亭如雷顛態喝月走君雖小病猶縱橫故鄉友朋得此樂貧賤可傲諸公卿一朝秋風颯然至豈知敗葉紛凋零蔣君客死在都下謝郎玉樹萎階庭君心慘慘益不樂沈疴竟爾歸瑤京今夏趙子亦化去存者數子如晨星清宵往往結冥想君或感我

竟纏縈獨憐神仙已骨蛻猶復戀戀圖中形九原諸子竟何在  
胡不泉路仍飛觥鬼官冥判是誰授生前潦倒死則榮我聞君  
家有賢婦日焚楮鏹百萬盈得毋入錢作典謁抑豈寸管脩文  
成公然來監鎖聽試絕勝矮屋低頭爭夢中惜不一扣扣君  
料亦終無聲陳思那得遮須國曼卿誰拜芙蓉城周顒忽除司  
命職魏徵乃補都錄名大都癡人妄說夢詎真有神司銓衡題  
君此圖破涕笑我亦嚙語誰其聽

詠琵琶老妓

手撥鷗絃水亂流四條寒玉盡生秋歌成鹽角空淒怨嫁得茶  
商只浪遊明月偏逢三五夜華年都送一孤舟波濤最是無情  
物聽罷風前也白頭

除夕祭詩

閒門如水上燈時祭了家祠祭我詩畢竟古人誰配享莫從人問只心知

玉壺已罄更難賒再拜惟將手八叉自笑清貧無物薦一盂涼雪一梅花



天眞閣集卷十三終

天真閣集卷十四

詩十四

昭文 孫原湘 子瀟

重光作噩

新春臥病

自恨蓮花藕作胎生前帶得性靈來情絲亂處成魔障心血枯  
時近鬼才每聽笛聲先哽咽如逢月色定徘徊壯懷猶自飛揚  
甚愁對東風又落梅

花外敲門定索詩畏寒人尙起遲遲但聞簷雨眠尤穩未息惟  
燈曉不知疾病自憐難用世遷延空復改行期幾生脩到無情  
物不怕人間有別離

欲去高堂有老親憂兒羸疾念兒貧絕裾忍便如溫嶠對策寧  
遲繼卻說三十蹉跎名位晚一家骨肉性情真巴臺只要黃金

築自有從容捧檄人

山妻笑折早梅新  
勸我愁顏一展顰  
但看此花能耐冷  
定知夫子豈長貧  
一年暫息無多日  
四海堪傳有幾人  
聽到同心溫語  
懣相如寒壁頓生春

二月四日病起時春光半矣而籬落梅花繁豔如故蓋  
爲寒氣所勒至此始全放也

病過春分始倚闌  
春情如雪未闌珊  
芬芳畱得遲來好  
光豔生從瘦裏難  
似欲言時須領會  
悄無人在獨盤桓  
憐卿耐盡清寒  
況不肯先開待我看

踏春詞

出城衣帶襲風和  
踏遍長隄軟綠莎  
人影不隨流水去  
桃花偏近墓門多  
埋愁未卜青山地  
行樂難揮白日戈  
無限世間須了

事一回春好一蹉跎

湖樓

纔上高樓思不禁酒痕先認隔年襟人多感慨情猶淺春過清明綠漸深有目難窮芳草盡無言又見夕陽沈桃花對客偏如笑未識憑闌一片心

杏殤詩

哭孫杏林也孫生甫周能言笑呼翁矣三月四日方陳設晬盤豆釀忽發閏八日殤舉家惜之爰效東野杏殤之作以紓予哀

去年生汝杏花香今歲花時賦杏殤不道嘉名成語識從今寒食怕思量人間卹落無仙種天上紅雲是故鄉何苦暫來還卽去欠伊東野淚千行

畫堂風暖試氍毹。睇日提戈笑鳳雛。纔學步猶須母抱。乍知言  
已解翁呼。能將滿座懽心引。爭不全家淚眼枯。我爲汝親。翻忍  
痛彊收悲咽。謝元夫。

幾番燈下暗淒其。苦憶投懷索笑時。薄福那堪爲汝祖。他生知  
道是誰兒。伯孫成立雖虛望。叔子重來未可知。流輩莫嗤孩抱  
物。鍾情每事近於癡。

喘絲將斷玉成灰。一夕猶看汝百回。索乳祇餘聲欲絕。含飴還  
望口能開。藥方終誤庸醫術。蓬矢難驅疫鬼災。今日招魂空翦  
紙。九原誰抱汝歸來。

桐棺如匣僅容身。送汝臨門倍愴神。草草便埋三尺土。匆匆只  
作一年人。犀錢玉果歸枯冢。繡袿珠衣化劫塵。爭得六仙人下  
世。一枝重茁杏林春。

目疾遣興

人身有雙童如國有宰相宰相如昏蒙百官職俱曠進退與物礙取舍惟人求天君雖湛然舉動豈自由絕無一隙明翫居口鼻右直是三不開豈止五歇後

婢言海棠開見報櫻桃熟頗似今世人徒以耳爲目既廢杜顓學空戴子夏冠內視滅思慮惟思張湛言終朝閉門坐怕見公孫述有時頭觸柱人道楊行密

客來當面坐謂我目無人卿不入我目非我敢拒卿既思誠自蔽再拜謹謝客我不能爲青亦豈敢爲白

客有謂我言汝疾緣好色天使障輕雲毋許見傾國我思色可好好之是公心不知子都美子興昔垂窺或者今世人妍媸悉顛倒天猶怒我目一見輒了了掩卻離婁明以揚瞽者睂昨聞

朱衣神乃是師曠爲

殘春

一夜風兼雨開牕百舌呼綠深蝴蝶靜花落美人孤小院衣初減高樓病未蘇出門見芳草愁思滿平蕪

同人拉觀水嬉余以目疾高臥而已

貪與諸君笑語緣卻來攤飯木蘭船看朱祇恐翻成碧知白何妨自守元暫使此心如木石不勞雙眼過雲烟人間多少魚龍戲只供閒鷗一覺眠

青梅

折得青枝綠葉中未黃時節最玲瓏齒牙清脆憑誰勝嗜好酸鹹豈俗同馬上卽今多渴成酒閒若箇是英雄年來世味多嘗遍莫把調羹問相公

內子名佩蘭屈宛仙夫人字協蘭嘗並寫如蘭圖近歸

夫人懋儀自上海歸寧日遣女奴馳詩筒往來兩家

夫人自號蘭皋予爲作蘭閨三友歌

徐蘭字芬若爲吾邑詩人之冠仙去不可作二蘭齊名起閨閣一蘭託根縹

緲一蘭挺秀瀟湘邊雨蘭性體並芳潔心是蘭心舌蘭舌清

吟日日吐蘭芬風吹詩香滿縣閨一蘭新從海上至別擅奇芬

發幽思幽思春融融來入雙蘭叢朝吟芳澤畔莫吟空谷中三

花同一氣勝如百和香三人同一心其言倍芬芳幾者冠博者

帶躍者馬張者蓋五策藝典墳七步不如孃子軍六韻哦湘靈

五言不敵夫人城我讀三家詩如品幽蘭萼玉榦黃殿講金陵

趙師博素心鄭少舉妙處各有託一春方苦病目深對此忽如

篴刮膜三人壓倒翁素蘭前明翁太常女我愧不及徐芬若



蘭皋覓句圖

風吹幽蘭何處香  
令人詩夢飛瀟湘  
夢如輕雲去無迹  
賸有詩情尙堪覓  
詩情不在紙上生  
澹蕩只在空中行  
正如蘭芬起微婉  
著意求之轉覺遠  
雙眸入水水不如  
不求珍珠求慧珠  
忽然拈花作微笑  
吟到成時剛絕妙  
一詩脫口香滿城  
大家聞著芳蘭馨  
門外詩人方索句  
踏遍湘皋無覓處

姚將軍彈琴歌

將軍豈作赤松想  
自愛名山抱琴往  
西峯滴滴翠欲流  
東峯沈沈月初上  
一彈洗秋籟再彈  
淨秋心吟操綽注  
兼衆音似指非指  
琴非琴忽然悠揚  
跌宕去又復迴旋  
鉤勒住飄蕭細響  
搖輕雲壓落停聲  
墜飛露曲終一聲  
寂然止手整瑤徽  
斂琴起山空月墮  
風不鳴疑有餘聲  
繞君指方今瀕海  
銷烽烟除卻組練  
兵

高眠英雄放下射賊手游戲只弄青琴絃將軍聲清如霹靂將  
軍雙手玉軫色時清祇覺一身閒勇大誰知萬人敵玉帳牙旗  
對碧阿將軍自抱琴摩挲請將鳳柱鵠絃理好奏白狼朱鷺歌  
秋杪雨泛

拂船老柳瘦參差烟雨空濛滿載詩閒日拌將濃福換西湖終  
覺淡妝宜難憑長笛吹天醒羞把衰顏與水知落葉蕭蕭秋寂  
寂醉中何事尙堪思

望海樓

翠微深處有高樓海色飛來畫棟浮落日慣招千古夢亂雲難  
埽一天愁魚龍氣溼騰空際鷄犬聲微出上頭莫問潮生與潮  
落雄心久已付閒鷗

送遠

秋來百感已蒼茫况是風吹別酒涼珠蕩一湖明月碎花飛十里亂楓香烟波轉眼皆陳迹草木關心是故鄉知汝今宵醒何處相思和鴈落瀟湘

金地山遠眺

丹梯百級上崔嵬四界烟雲撥不開動郭江聲舍雨大隔湖山影抱秋來銷金一窟偏安計彊弩千枝定霸才多少興亡鷗夢裏西陵松柏卷空哀

呂女貞孝詩

常州蔣氏  
董養媳

謂全乎女兮而已見其夫謂全乎婦兮而未見於姑其在蔣兮  
潔孝饗兮曰童養兮其在呂兮終喪毀兮曰室女兮女之德兮  
婦之職兮二十五年如一日兮疇絃此詩示壺式兮

龍湫聽瀑

四無人聲山太古一條白龍作秋語雙崖劈破青天驚亂撒珍珠不成雨神仙栖心在冥冥耳根自喧心自清人間萬籟如雷霆揮手雲中笑不聽

西郭

畫景詩情觸處新蘭橈隨意蕩湖濱雲如空際孤飛鶴秋是中  
年絕豔人碧水氣清同澹蕩青山骨瘦自精神玉樓縹緲秦簫  
斷紅殺霜楓不當春

持螯獨醉

此時不飲負秋風笑看霜螯一背紅入手累人忙左右何心爲  
汝論雌雄西師戈甲望全洗南國稻粱謀已空滿地黃花拌盡  
醉亂愁偏在夕陽中

上海訪李安之上舍

學璜

雙管草堂安之出蘭皋夫人

詩稿屬題

文心宛轉綠蕉裁雙管繽紛五色開格在宋元明以上人兼仙  
佛鬼爲才羣花低首孤松立萬籟無聲一鶴來令我深情移海  
上詩寬如水日低徊

立春日謁李味莊觀察

廷敬

時公方交臬使篆回上洋

節署

條風初卷碧幢斜綵仗爭看使者車一夜陽回春有腳萬間廣  
庇屋無遮雪知畱客先飛絮梅解迎公亦放花手執霜臺活民  
筆登臺來寫海東霞

也是園早梅初綻

老榦半枯折況經冰雪摧如何明月下已有暗香來瘦影寒欹  
沼孤枝靜臥苔無人解幽賞原不爲人開

雙管草堂卽事

留賓事事累親裁東閣南軒迤邐開  
鳥爪工書無俗體蛾眉寫韻是仙才  
夢覓慣被琴彈醒咳唾都從玉化來  
一樹梅花人一箇中天明月共徘徊

席上賦福橘

輕紅三百洞庭春開榼香風舉座珍  
逕欲懷歸遺老母妄思坐隱學仙人  
情叨地主分甘好手普天公賜福新  
飽讀襄陽耆舊傳木奴千樹足終身

葬花圖蘭皋屬題

就使飄茵亦可憐不如埋玉付重泉  
清明過後無人掃蝴蝶漫山當紙錢

徼幸芳覓得所棲一抔小築夕陽西  
花中亦有楊妃慘狼籍東

風觀馬蹄

未乾香土已黃昏  
滅盡嬌紅姹紫痕  
賸得護花旛一扇  
風前猶是管招魂

了無片石誌孤墳  
翦葉爲箋製誄文  
濃綠有知應自感  
他時誰與葬秋雲

味莊先生見餽肴蒸八簋朱提五流詩以誌謝

憐才恩比海波寬  
推食先邀賜玉餐  
身到龍門知大夏  
手分鶴俸慰孤寒  
科名偶附郎君後  
培植真如子弟看  
此去長安重回首  
爭禁知己淚偷彈

疊前韻留別安之蘭皋

客裘都費主心裁  
風滿春帆不忍開  
能愛土偏輸女士解  
憐才始是真才一  
庭花木看逾好  
萬里關河夢要來  
臨去尙貪留片

刻曲闌相送故紆徊

元默闌茂

雪中訪故人不遇

冰翦烟絲玉翦雲琴聲寂寂思紛紛入門一笑香風滿但見梅花不見君

北行

高臥忽不適回頭謝楚狂今時需俊傑斯道託文章飢渴思吾赤升沈聽彼蒼出門西向指太白正光芒

子梁餞我

十年香火弟兄親杯酒臨歧倍愴神握手曾無三日別關心真似一家人荀何各爲衰親養劉祖終非處士身此去行藏原未定暫時分袂莫霑巾



花朝寄內

鞭絲帽影抗黃塵苦憶蘆簾紙閣人愁思莫減紅豆子歡顏好  
慰白頭親齋鹽久累持家健椒茗應添製作新牕外百花齊放  
香一杯爲我酌花神

翦彩風光憶去年綠牕紅裏擘蠻箋天含細雨春如夢人對梅  
花淡欲仙鈴索自搖心蕩漾爐烟不斷意纏綿銷魂禁得思量  
著況在天涯更惘然

玉樓風細杏梢晴別恨應如百草生蘭向春須調冷煖藕空心  
太費聰明侍兒問字休逢怒嬌女遲言足慰情手疊銷箋成出  
字難憑燕子寄卿卿

惜別尊前燭淚紅同心蘭語贈梁鴻紀程莫負花生日入世宜  
如柳下風時命正須商出處文章何足賺英雄枇杷曲子櫻桃

醺早在蛾眉一笑中

河間客舍憶亡友吳研史

手拂征塵淚滿巾故人曾共駐雙輪因看上苑花無分偶折旗  
亭柳當春奇疾究緣時感憤清才竟與世沈淪當時希孟風流  
甚宋史居然道學人

雄縣大水平田皆成巨浸慨焉傷之

四望烟波竟渺然風光全不是幽燕一條白認湖邊路百里青  
無屋上烟不信桑田變滄海只看騎馬似乘船行人莫羨嘉魚  
味中有沈寃幾萬千

雜紀

神京列九市車馬闐城闐煌煌四達衢多有餓死人云自去年  
夏淫潦六七旬衆水決隄堰都邑成通津西南諸郡縣人畜俱

漂淪死者葬魚腹生者爲游鱗 詔書下丹禁嗟此昏墊民就  
食來京師有司發倉囷施糜設官厰督以親信臣更置平糶法  
秋冬及今春來時八口家今已存子身溝渠白骨多無命露

皇仁

晨涉梁家園男婦趾相錯餅甌遠攜將競就粥一勺食罷更他  
顧市頭恣拏攫雖登饑民簿半恐游丐託郎官坐高車稽核頗  
嚴恪毋致漏與混階下聲諾諾歸經宣武坊有女足纖弱手抱  
垂死兒氣喘雙淚落夫壻久漂沒阿翁在溝壑惟我與老姑僵  
仆不能作當街聲如雷車輪互擊搏傳呼司農來前馬腹上躍  
颺輪日奔馳云是指揮使里保相傳呼當街驗人斃東頭橫陳  
三西頭橫陳四次第檢眡畢榻榻薄而脛輦出西都門倉黃草  
中棄空棺隨人還瘠肉大爭噬殘骸賸破衣衣縫縫券契水田

一萬頃某年月日置莫笑足穀翁今日葬無地赫赫黃頭郎餓死乃常事

有兒抱空罌繞街泣不止云貸三百錢買米向東市彊梁奪之去追逐折其齒阿父病在牀阿孃饑欲死無米徒手歸一家命休矣繡衣巡城來過之掩兩耳按治豈無法法爲災黎飢人饑乃奪人彼此皆赤子方今 皇帝仁有 詔置勿理

東鄰發火鎗西舍敲銅鈺不意輦轂下終夜有此聲五城街有堆堆有宿衛兵一堆夜呼起百堆相應鳴盜賊雖亡命遇人亦先驚如何曰初舖胥篋敢縱橫或云是饑民冒死求一生白晝走且僵宵黑烏能行伏枕廢安寢此事難分明明朝告京尹京尹門前清搖手道勿語此處乃禁城

法梧門祭酒

式善詩龕歌

當代詩壇誰豎拂人中祭酒詩中佛詩佛不在南海南蕭然人  
海藏詩龕一龕之中詩萬首彈指華嚴無不有一龕之外厦萬  
間大庇寒士俱歡顏有時手執金剛杵生縛詩魔與詩虎有時  
洞開蓮社門招來詩鬼詩仙竟莫言一龕小如芥芥子能藏詩  
世界五字長城盡受降始知我佛神通大我來頂禮詩龕前天  
花亂落非人閒詩星孟浩然詩祖賈浪仙一齊來結驪壇緣忽  
開野狸穴遁出羣狐精公然來與佛爲難不許詩教傳光明龕  
中放出青蓮花三字妙咒思無邪請公高坐宣梵夾我是韋陀  
詩護法

王仲瞿過穀城以酒脯祀項王墓并攜琵琶女樂侑神  
得詩三首比來京師出以見示予與大興舒鐵雲孝  
廉位從而和之

一杯熱血奠幽宮空際靈旗颯楚風死有人爭分五體生無天命枉重童范增不解留韓信項伯偏圖走沛公百戰河山成底事帝王原不在英雄

玉玦三看赤帝愁鴻門一誤又鴻溝無心殺季非仁懦并力除秦是本謀獨棄關中酬故將平分天下與諸侯雌雄劉項分明在本紀原應楚出頭

杜默清狂有晉身檀槽鐵撥爲迎神敢將文字翻遷史欲弔英雄用美人鬼馬怒嘶陰夜血山花紅作戰場春霸陵弓劍長陵土一代匆匆萬劫塵

法梧門先生見題拙集依韻奉答

人海萬人誦詩龕一卷詩正聲今日少此老十年思筆下無前輩寰中幾素知相逢果相識不恨見公遲

清絕梅花月相思入夢頻感公偏比我知己有斯人贈詩云江梅如爾病

樓月為誰新詩好能忘貴交深不論新黃金臺下客相賞問誰真

楊蓉裳民部芳紫過訪

王後盧前語不誣弟兄才筆冠中吳令弟荔裳方伯揆齊名稱二楊六朝最近

東西晉四海交推大小蘇竹使賢聲留廣武金甌清望重司徒

朝來喜慰稠饑望卻憶楊雄在蜀都

壺關申南邨瑤由駕部郎擢御史先君昔守上黨曾來

執業門下語舊之餘拳拳故誼慨然賦此

烏府新班貴丹墀宿望清屠剛漢御史申續孔門生道路方多

殢朝廷未息兵如懷知己德望爾鳳先鳴

十九年前事春風各少年廣場盤馬地深雪射鵬天角執諸生

肅論文太守賢不堪重語舊雙淚酒尊前

贈戴金谿比部

敦元

人生知己不可求  
瀟湘未必無合流  
白雲一片起東海  
須臾并作羅與浮  
我識金谿二十載  
鴉金嶺畔仙居在  
金谿識我十五年  
春風嬾臥虞山巔  
大家識名不識面  
走馬來尋喜相見  
如此茫茫人海中  
不詣公卿詣貧賤  
我才愧非劉桓公  
乃逢說經戴侍中  
贈詩字字出肝鬲  
想見欲語羞雷同  
君才合侍蓬萊宮  
論兵或成頗牧功  
卻辭文章苦讀律  
刑措欲致唐虞風  
我獨感君愛我德  
願君返本求之亟  
方今楚蜀多盜賊  
半屬良民被官逼  
急須峻法按貪汙  
未可仁心事姑息  
高呼古咎陶化爲  
祥鸞來擊臬君  
雖郎官不佩刀  
毋學梅鄭徒風騷  
以殺止殺天下治  
殺百窮寇不如殺  
一貪吏

春草



一夜東風煖枯根最早知無心逢雨露得氣勝花枝青到明妃  
冢香生屈子祠天涯歸未得遍地是相思

梅

占一枝春竹外斜東皇特許領韶華紛紛得氣諸桃李君未花  
時不敢花

杜二梅溪補新城令不半載告休來京師謀歸計贈之  
以詩

誰似街西小杜狂對人清淚兩三行哀鴻滿地救不得長揖軍  
門歸故鄉

題張船山太史

問陶

勾漏山房

手抱裁眉月來從玉署眠縱橫詩世界遊戲酒神仙青眼空人  
海丹砂覓稚川鏡臺雙笑日嬾步八花磚

梧門先生招集詩龕卽席同武進劉芙初

嗣緒

洪孟慈

節孫

東鄉吳蘭雪

嵩榮

臨川樂蓮裳

官譜

一龕香氣勝旃檀到此詩人盡佛看三月長安求米貴九州高  
士盡簪難銀盤饒節思鄉土鐵網收材仗冷官願與諸公更洗  
酌乾坤風月醉中寬

顧阿瑛笠屐像梧門先生屬題

雲林圖繪鐵崖歌琴酒風流足淵阿自分史書宜隱逸那知人  
世有干戈玉山佳處軍需少金粟前身佛性多恰稱詩龕清供  
養雙懸笠屐配東坡

醉夜與汪海樹貳尹

瑚

邵蘭風茂才

廣銓

席子侶同臥

錢金粟孝廉

林

寓齋

玉山並倒影縱橫轉側俱難寐易成畢竟同牀原各夢何嫌臥

扇有麝聲小窗起舞誰琨逖大被奇溫勝弟兄伸腳未妨加腹  
上客星相犯不分明

謝芳姿團扇曲

仲雅配金雲門夫人  
製圖仲雅屬題其左

王郎手弄天邊月扇手同時白於雪謝家小女勝常娥飛墮懷  
中兩奇絕扇頭蛺蝶乍雙飛扇底流螢閃眼窺擊壁竟逢邛嫂  
怒荆條忍被綠翹威此時辛苦羞郎見此際恩情懼中變縱有  
團圓璧月輪難遮顛顚春風面苦將紅淚灑冰紈彊把新詞賦  
合懽樂昌破鏡應同恨莫作坤靈扇子看此事風流何豫嫂我  
一思之真絕倒豈緣新婦失參軍反怒陳平空美好可憐王謝  
散鴛鴦不及堂前燕子雙柳絮此時沈下土桃根何日渡春江  
從來謝女多情甚道韞芳姿實相稱小郎若遇解圍人人種定  
邀追馬贈我道恩情恐不終班姬團扇感飛蓬秋風若使捐陳

篋明月母寧挂碧空雲門夫人識此意畫出團圓晉時製寄與  
王郎天壤看莫教中道成捐棄

送春和蘭風

綠陰驕受露華鮮委地紅芳祇自憐草草東風一場夢迢迢南  
陌九重天蜨尋深草迷歸路人對斜陽憶去年任爾銅山傾百  
萬有誰鑄得買春錢

讀史

武帝窮開邊財不足奉兵乃置武功爵超用至樂卿黃霸得賞  
官爲政稱寬明相如旣爲郎作賦天子驚得人盡如此焉用諸  
科名黃金有輕重絕勝空持衡拙哉董仲舒固以興學爭未聞  
桑宏羊果以言利烹

成帝鄉經學尊禹以師事雖避丞相位國政必咨議永始元延

間日蝕數災異吏民上書言變實椒房致天子頗動心車駕親至第是時禹一言王氏去猶易如何爲兒孫恩附外戚勢五侯迭弄權漢祚遂日替枉讀春秋經爲作佞臣地朱游請劒時干將苦不利

漢末政令衰州郡紛盜賊將吏如趙

序張叙

望風先背敵畏懦

不敢進卻詐增首級猶幸軍法明捕治悉無匿後來中平年黃巾遂不息帝方憂軍儲太官減御食盧植功垂成檻車反收植董卓討無能尋進驃騎職

炎漢多士人而入佞幸傳惟有李延年身係故倡賤新聲妙起舞自以女弟薦父母及兄弟皆得沐優眷漢家外戚寵履霜此其漸季也亂後官夷族亦已晏匹夫敢惑君罪當立誅譴時無魯仲尼誰請三尺劒

桓譚鼓琴侍宋宏自免冠薦士非其人朝廷罪王丹漢法坐舉  
主保任終身難所以四科增專取內行端隋唐置進士始偏尙  
辭翰雖用覆試法較勘亦已寬張奭擢高第曳白篇不完僧孺  
對策誤終得登金鑾不知沈沒死多少真孤寒欲得士行脩請  
誅貢舉官

張儉辭茂才薄其刺史行相如因狗監終爲世詬病人臣道事  
君始基可勿慎朝廷雖乏賢奈何託優孟琵琶奏新曲甘以伶  
人進倉黃陷賊時晚節終不勁聖主求賢臣亦務正人引勿聽  
周匝言景州與陳俊

落花和仲瞿

萬紫千紅夢一場神仙小劫恨茫茫飛揚氣不甘人下飄泊身  
難自主張姪女但知榆莢數酒徒偏覺柳花香長安九陌東風

力只送塵沙上玉堂

滿天紅影下如潮香骨雖消恨未消  
小草得時偏雨露低枝回  
望若雲霄久開天亦窮材力不落人  
翻詫木禡知否黃華耽隱  
逸一生從不受風飄

玉階繡遍輦花氈滿地文章不值錢  
西子飄零難再嫁東皇愛  
惜苦無權塵緣去住隨風伯浪迹浮沈自水仙  
休對空枝枉惆悵扶桑紅亦落西天

美人雲鬢酒人卮小朵曾看素手持  
幾日便成前世事再來難  
認隔年枝生理愁骨終無地殉葬香  
魂只有詩莫向亂書堆裏  
住今生恐沒出頭時

九天疑有散花魔亂撒胭脂下絳河  
續命豈能邀赤帝失恩已  
分老青娥漫嫌夜合榮華短自是冬  
烘發洩多解惜春光有蛛

網閒庭白日苦張羅

一聲仙笛事淒涼怕逐遊絲上下狂青眼更難逢阮籍白頭枉  
自認劉郎小園客去呼童嬾高第人歸走馬忙驕絕綠陰天盡  
蔽幾曾知道有秋霜

下第後戲贈霍郎小玉

尹邢終究孰娉婷評點妍媸帶淚聽同受人間顛倒殺下場舉  
子上場伶

遏雲清響繞空梁燕雀無聲坐滿堂唱殺碧雲天一曲北人都  
不愛西廂

雙髻顏雲兩眼星長亭哀怨唱旗亭明朝我亦登車去如此淒  
聲不忍聽

如雪如花日炙消勸郎歸趁大江湖如何苦戀黃衫客日看沙



吟氣色驕

一斛珍珠百綺羅  
泥郎行酒索郎歌  
郎心莫似釵鬟  
輒世上相逢李益多

愛郎心似愛才心  
未必郎知我意深  
清夜忽然雙淚落  
平生我亦負知音

舒鐵雲以北人僑浙榜後相約南轅因次見題拙集韻  
奉贈

春風如有意吹合兩浮蘋  
花下消覓日天涯落  
覓人見遲嫌去促  
形畧識交真一片  
鶯湖水相期把釣  
綸手錄君詩去逢  
人道謫仙蠻箋光  
萬丈羌笛調三邊  
歸計白頭養春心  
黃面禪南飛鳥鵲  
好明月共吳天

斧資告匱無力南轅  
古雲英伯弟均解  
驂借我并饋旅

賀奉謝二首

太傅勳名在九州賢孫才望繼風流門多車轍皆名士坐擁書  
城是小侯康樂告身原一品王孫盡手自千秋南皮文醺南咳  
養總感 君恩許退休時方解散  
秩大臣事  
驢券難謀出鳳城多君借我左驂行人逢歧路無豪傑事到窮  
途見弟兄經雨落花寧再起逆風歸鳥不知程此心歲歲如春  
草長入西堂曉夢清

聽松圖

天風入松松入泉泉聲倒捲松飛天青龍白龍鬥秋語碧天無  
言滿空雨雨聲一夜山欲浮起看明月正打頭一重秋烟一重  
水世上萬聲不到耳

約陳沅香

晉

買醉不值詣陸祁生

繼輅

則已先日南下

滿眼傷春淚相期舞一場綠陰新殿閣青草亂文章空約陳遵  
酒難攀陸賈輒紅車馬隊獨自立斜陽

題朱山人鶴年畫龕

破屋三閒當小庵閉門綠樹似江南紅塵儘有閒人在清靜除  
非古佛堪米怪倪迂萬邱壑周妻何肉半瞿曇燕雲回首相思  
地一箇詩龕一畫龕

疫

道殣蒸初夏災行遍九衢未應分貴賤正恐混賢愚  
帝德方寬大天心必感孚死生皆有命底用召神巫

重過項王墓

憤王墳上草先秋如此興亡一哭休七十戰纔餘寸土八千人  
恨不同邱時來雉亦烹功狗事去人爭笑沐猴顙顙孫郎重下

拜江東歸去有扁舟

至兗州脯貲又竭喜遇仲瞿鐵雲約同車南下

一笑黃金盡天涯又夕曛不逢狂杜默誰識老劉黃白手商驢  
券青天指鶴羣南樓且同醉閒看嶧山雲

登兗州城南樓

一層樓接九層天極目齊州九點烟任土尙餘屠草木版章猶  
識魯山川恭王絲竹悲風響魏武旌旗落日懸如我登臨能幾  
輩少陵身後一千年

龔

緣鬚繞鼻太相親對案那禁拔劍瞋未死何勞爲弔客此生難  
避是譏人竊窺風雅原貪墨爲戀膏脂肯顧身手捉塵毛纔一  
握如何驅得盡紅巾

故紙穿時得意鳴人閒那有此鑽營雞聲易惑三宮聽驥尾從  
誇萬里行誤點丹青彈不去倒施黑白洗難清埽除只望西風  
起穩臥空堂夢太平

東魯書院之南有少陵臺焉下祀文貞像循級而上得  
七十餘武捫碑讀之爲康熙十八年趙蕙芽令滋陽  
重建蓋南樓故址也乃悟向所登城南樓非是適昆  
陵趙味辛懷玉來守是郡招同仲瞿鐵雲子侃登臺  
延眺發懷古之思慨然有作

高臺凌穹蒼齊魯山在眼海色浮空來連雲結遙巘登臨慨古  
衰談笑惜景轉暫洗京洛緇聊用心目遣少陵不可作風雅義  
日淺孰察離騷音芳菲託忠謇毘陵趙舍人一歷來守堯十日  
甫下車百廢勤露冕偶乘爲政暇飛旂共游行列筵肆深酌卷

嘖嘖流眄人烟感祥和草木亦美善大道苟可行豈惜暫施展  
遠尋魯靈光廢壠牛羊踐茲臺巋然存獨以詩人免平生厭風  
塵幸得避兵燹空懷稷契志安見沮溺顯青天本廓如閒雲任  
舒卷立言映千春亦足紹墳典

恭謁孔林作

泰山絕頂一枝龍陡結蕭蕭四尺封萬世帝王來拜掃九州文  
脈此朝宗賊猶北向投戈去水亦西流屈性從薄植自憐如小  
草託根難傍墓門松

周公墓

分陝勲勞灑澗濱何時反葬魯城闔生疑家相爲天子死有儒  
宗作部民二叔事開唐社稷六官書誤宋君臣不論心迹論形  
迹操莽公然學聖人

觀蒙頂出雲

絕壁忽搖動亂雲穿石開依然不成雨何事出山來

雨阻費縣題崇文書院壁留謝縣尹

雨聲三日住雲窩不許勞人草草過  
蜨繞半牀姬旦夢蛙喧兩部武城歌  
淫淫馬足愁難渡頓頓豬肝累已多  
爲報東山賢令尹種花閒暇勸民禾

六月望夜宿紅花步

茅齋如斗月如盤穩駐雙輪竟夕歡  
邨女登牆來看客官廚走馬爲傳餐  
一欄花氣和烟重四野星光出水乾  
漸近江南好風景夢覓歸去也平安

運河

一緯千夫輓倒瀾東風轉漕上長安  
禹功只鑿西行險民力教

喻北地難遠道可勝流馬運防秋敢恃木龍蟠神倉正望飛芻  
急莫檢河渠上策看

玉軸牙樯建節旟福星輝映富民渠東南自置租庸使西北誰  
脩水利書敢惜金隄支歲帑方資玉粒濟邊儲歌成瓠子民休  
怨汲鄭奇功自古無

### 渡黃河

飄然身在斗牛邊風急真如怒馬顛萬里橫行忘故道一條濁  
浪逼青天澄清空擊中流楫殺賊誰呼北渡船對此不妨輕一  
笑封侯吾已薄張騫

### 舟中贈仲瞿

四十王郎不遇時目光如電鬢如絲一身兼學儒仙佛三好難  
忘書畫詩烟水欲歸高士傳風波幾入黨人碑少年傳食公侯



策若箇能知李藥師

揮手黃金擲羽毛邀予同乘更同舫五湖秋老三龍隱萬里霜  
清一鴈高花柳外無餘事在江山間得此人豪有家未擬輕歸  
去且泊韓臺共釣鰲

守風袁浦舟中再贈鐵雲

小市橫街乍識君落花同賦雪紛紛詩名早記紅紗壁書法爭  
求白練裘絲竹春聲蕭協律樓臺曉夢杜司勳南來一種風情  
勝莫念家山望北雲

清淮六月水聲寒小泊檣烏日半竿此去江山如畫好向來花  
月並愁看百年交誼醇常醉一路題詩墨未乾寄語前途風莫  
轉到家容易別君難

舟中書所見

缺瓜船小可容身供了荷花供美人烟水四圍風一面白鷗來  
往作鄉鄰

乍驚鴻影出橫塘花拂晶簾暮雨涼偷照龍宮明鏡子海雲齊  
學妙鬢妝

昭明文選樓

摘罷芙蓉少海涼碧雲遺址鶴來翔二分明月高先得一點文  
星作有芒殿上博山方飾翠夢中班劒早飛霜玉樓若問東宮  
籍已有禡人畫始皇

歸舟漫興

便捉祥鸞當玉驂不如單舸下東南泥人紅裊花齊笑到處青  
山佛可參間且閉門書甲子勤還種菜課丁男肯拋烟水頭銜  
好苦苦當官禿筆簪

舟達邗溝別仲瞿鐵雲先行約至吳門相待

揮手雲先渡曉關垂楊城郭水彎環腰纏騎鶴仙無多目送飛  
鴻客自還下第文章秋後草過江樓閣畫中山虹橋酒價如泥  
賤爭似吳歛唱綠鬟

晚渡楊子江

一笑無南北風帆面面開天門牢鎖鑰仙掌託樓臺水卷六朝  
去濤奔萬馬來夕陽紅欲老擊楫又空回

晚霞

五色春絲繡滿天詩情總到晚來妍人間無此嬌顏色除是羅  
浮夢裏仙

舟行苑山蕩入小港不得出

一面東風兩岸葭迷離烟水值三叉中年下第悲歧路貧士還

鄉怕到家乞米饑難餐綠字賣文愁又遇紅紗故山相見如相  
笑飽看長安二月花

還家示內

一笑輕裘掃葉空依然潑茗畫堂東遠歸祇覺貧俱好天道無  
如熱最公別後新詩互商畧眼前家事且朦朧同心喜得黔婁  
婦荆布看來黻佩同

天真閣集卷十四終